

Naqqiut

Saqqummiussinnermut allakkiaq 22. august 2018-imeersoq taarserpaa
(Artikeli 2-mut innersuussineq Artikeli 10, imm. 2-mut naqqinneqarpoq)

Inatsisartut aalajangiiffigisassaattut siunnersuut Namminersorlutik Oqartussat ilalissagaat Nunat Avannarliit isumaqatigiissutaat qaffasinnerusumik ilinniagaqarnissamut isersinnaaneq pillugu.

(Ilinniartitaanermut, Kultureqarnermut, Ilageeqarnermullu Naalakkersuisoq)

Saqqummiussinnermut allakkiaq

Siullermeerinnineq

Naalakkersuisut sinnerlugit matumuuna saqqummiutissavara Inatsisartut aalajangiiffigisassaattut siunnersuut, Namminersorlutik Oqartussat ilalissagaat qaffasinnerusumik ilinniagaqarnissamut isersinnaaneq pillugu Nunat Avannarliit isumaqatigiissutaat.

Pineqarpoq isumaqatigiissut nunanik avannarlernik assigiimmik pisussaaffiliisoq, ilinniagaqartunut nunami avannarlerni allami najugalinnik ammaassisarnissamik, pisortat qaffasinnerusumik ilinniartitaanerit, nunami namminermi ilinniagaqartutulli atugassarititaasutigut pisinnaatitaaffeqarlutik.

Kalaallit Nunaat 1997-imiilli ilaavoq Nunani Avannarlerni isumaqatigiissummi qaffasinnerusumik ilinniartitaanermut isersinnaanermut tunngatillugu. Isumaqatigiissut taanna pilersitaavoq 3. september 1996, tamatumalu kingorna arlaleriarluni sivitsorneqartarsimalluni. Kingullermillu sivitsorneqarpoq 2015-imi, isumaqatigiissut piffissamut 2016-2018-imut atortussanngorlugu.

Nunat Avannarliit Ilinniartitaanermut Ilisimatusarnermullu ministeriisa ulloq 26. marts 2018 aalajangerpaat isumaqatigiissut sivitsorallarniarlugu 1. januar 2019-imiit, ilutigisaanillu aalajangerneqarluni isumaqatigiissut allannngortinneqassasoq isumaqatigiissutip atuuffiata sivisussusia eqqarsaatigalugu. (Artikeli 10, imm. 2). Artikel 10, imm. 2-mi isumaqatigiissummi tassani aalajangersagaavoq isumaqatigiissut 1999-ip naanerata tungaanut atuuttusoq, allamik tamanna sioqqullugu isumaqatigiissuteqartoqanngippat. Taamatut oqaasertaliisimanerup kingunerisaanik maannamut pisariaqartarsimavoq isumaqatigiissutip sivitsornissaa nunat tamanna pillugu aalajangernerisigut, piffissap sivitsuiffiup naannginneri tamaasa. Artikel 10, imm. 2-mi nutaami aalajangersarneqarpoq isumaqatigiissut atuutissasoq allatut isumaqatigiissuteqartoqarnissaata tungaanut. Tamannalu isumaqarpoq isumaqatigiissut piffissamut aalajangersimasumut atortuujunnaarteq, taamaattumillu sivitsortagaajunnaarteq.

Isumaqatigiissutip imaanut tunngatillugu innersuunneqassapput aalajangiiffigisassatut siunnersuut pillugu allaaserinnineq aammalu isumaqatigiissutip oqaasertai.

Kalaallit Nunaata isumaqatigiisummik ilaliineratigut kalaallit ilinniagaqartut akiliutitaqanngitsumik Nunani Avannarlerni sumiluunniit ilinniartitaanernut isersinnaapput. Naalakkersuisut kissaatiginartippaat ilinniartitaanernut isersinnaanermut periarfissap tamatuma attatiinnarneqarnissaa. Naalakkersuisut taamaattumik inassutigaat Namminersorlutik Oqartussat ilalissagaat isumaqatigiissut oqaasertalersorneqarnermisut nutaatut isikkoqartillugu.

Taamatut naatsumik oqaaseqarlunga aalajangiiffigisassatut siunnersuut Inatsisartunut suliassanngortippara.